

## In cler na a l'iniziativa da la GSoA

■ (anr/ld) Il cussegl naziunal ha refusà l'iniziativa dal pievel da la «GSoA» da dismetter l'obligaziun da far servetsch militar cun 121 cunter 56 vuschs e 6 abstenziuns. Era las cuntrapropostas han gì naginas schanzas. La Gruppa per ina Svizra senza armada (GSoA) ha inoltrà cun 107 000 suttascripziuns ina iniziativa dal pievel che pretenda la dismessa da l'obligaziun da prestar servetsch militar. Il servetsch militar duai esser – en il senn da l'egualità – facultativ, tant per ils umens sco er per la dunnas. Ils verds e la sanestra han sustegnì l'iniziativa cun ils arguments che la situaziun da smantscha saja sa midada, diversas naziuns han dismiss l'obligaziun da prestar servetsch militar senza problems. Divers oraturs ed oraturas han crititgà che noss'armada custia memia bler e na fiss betg abla da defender la Svizra en cas da guerra.

Ils represchentants da las partidas burgaisas han defendì il princip francà en la costituziun federala che pretenda en l'artitgel 59 l'obligaziun per mintga Svizzer da far servetsch militar. Per las dunnas è il servetsch facultativ. L'obligaziun da far servetsch militar duai valair per tut las classas socialas. Ils defensurs da l'armada tradiziunala han fatg attent che la Svizra perdess la suveranità e fiss dependenta dad autras naziuns per la protecziun da la patria. L'iniziativa muntia in pass decisiv per dismetter l'armada in summa.

Cusseglia federal *Ueli Maurer* ha fatg attent che l'armada saja vegnida reducida da 800 000 sin actualmain 100 000 schuldads. En cumparaziun cun ils custs da las armadas en auters pajas saja l'armada svizra favuraivla. Ina armada fundada sin il princip da prestaziun facultativ na garantiss betg la protecziun da la populaziun e da la patria en cas da smantscha, ha accentuà Maurer.